

27
DECANI FACULTATIS

MEDICÆ

JO. HADRIANI
SLEVOGTII, D.

ANAT. CHIR, ET BOTAN. P.P.


MED. DVC. PROVINC.

PROLVSIO INAVGVRALIS

De

ACMELLA CEYLANICA

NOVO FLVORIS ALBI REMEDIO



J E N Æ,

TTPIS GOLLNERIANIS.



Vi amplissimum *Materiae* medicae ambitum nostrae ætatis cum angusta penu prisci ævi conferunt, illum quidem vasti corporis, hanc vero umbra ejus brevissima, qualis est, cum Sol ad culmen cœli venit, speciem exhibere deprehendunt. Postquam enim *Philosophia naturalis* Cultores puri theoretici esse desierunt, & sterili in Aristotelem commendatione defuncti, ad *ποίνων* deflexerunt, relictisque nudis fictisque de corporum constitutione speculationibus, per *Chymiam* res sublunares, tantum non omnes, in minimas particulas resolvere, earumque *interanea extrorsum* vertere, hinc singula phænomena per *Mathesin* ad justas motus ac mensurae regulas & leges examinare, resque invisibiles, microscopiorum ope, mentis atque oculorum censuræ exponere consueverunt; reperta est nobilis illa clavis, abditos Naturæ aditus recludendi, qua mediante hodie in omnibus mundi angulis, quos olim divitiarum tantum gratia mercatores perreptabant, a sagacibus ingeniis, per artificiosa experimenta, incredibilia incrementa, in genere quidem artibus universis, in specie autem *ἡ ἰσχυρὴ ἰατρικὴ* comparantur, & quotidie vel recentissime inventa, vel apud exterarum gentes jam diu usurpata medicamenta ad nos perveniunt, nostrisque temperamentis apta & salutaria redduntur. Quod vero antiquissimis temporibus Medicina adeo paucarum herbarum fuerit scientia, haud prorsus defectui adminiculorum, quibus in præsentia abundamus, adscribendum est, cum adhuc aliæ ejusmodi simplicitatis rationes alle-

alle-

allegari possint. Quamvis enim, autore Celso, in præfat. lib. i. *Æsculapius rudem scientiam medendi excoluerit, ejusque filii, Podalirius & Machaon, Agamemnonem secuti, non mediocrem opem attulerint suis commilitonibus; ipsos tamen vulnerum magis, quam aliarum agritudinum rationem habuisse, internosque morbos tum ad iram Deorum, relatos, & ab iisdem sanitatem postulatam esse, ex Homero discimus; veroque simile videtur Celso, inter non multa auxilia adverse valetudinis plerumque tamen eam bonam contigisse, ob bonos mores, quos neque desidia, neque luxuria vitaverat; siquidem hæc duo prius in Græcia, deinde in Italia corpora affligerint.* Cum etiam olim ex minus artificiosa commistione radicum, herbarum, aliorumque simplicium, purgantium inprimis ignorata aut neglecta correctione, ut plurimum sapor ingratisissimus, nauseam stomacho creans oriretur, corpusque subinde vehementius commoveretur, atque adeo, quod expressis verbis Celsus urget, *multiplex ista medicina vix aliquot, ea utentiū, ad senectutis principia perduceret: hinc eam, ceu minime necessariam ac tutam, diu nulli clari viri exercuerunt, removitque Asclepiades magna ex parte, quæ vel Zeno, vel Andreas, vel Apollonius copiose de facultatibus medicamentorum memoriæ prodiderant, & ad ipsius victus rationem potius, quam hodie Dietam appellamus, omnem curam suam transtulit.* Donec, teste eodem Celso, nonnulli magno studio literarum disciplinas agitantes, *robur corporis sui inquieta cogitatione, nocturnaque vigilia minuentes, ad Artem medicam juxta ac Philosophiam animum appellere cogerentur.* Hac occasione medendi scientia, usque ad Pythagoræ, Empedoclis, Democriti & Hippocratis tempora, *sapientia pars habita, morborumque curatio & rerum naturæ contemplatio ab iisdem autoribus exulta fuit, Medicisque inde Physicorum nomen mansisse videtur.* Cum autem Hippocrates, *vir & arte & facundia*

in signis, cui, secundum § 4. lib. de Arte, ex versione Lindeniana, invenire aliquid eorum, quae nondum inventa sunt, quod ipsum notum, quam occultum esse praestet, similiterque imperfecta ad finem perducere, ζυvéσιος ἐπιθύμημα καὶ ἔργον εἶναι, prudentia votum & opus esse videbatur, Medicinam, quam κατ' ἐξοχὴν passim absolute λέχυνν, Artem vocat, ab aliis disciplinis segregare, eamque indies ampliore ac perfectiore reddere conaretur; tantos equidem successus habuit, ut in plerisque medicinae partibus θαυμάσιος, propter prognosios autem excellentiam, ἰσὶ θεοῖς appellari meruerit, & tam Celsi tempore, praef. in lib. 2. autoritas ejus & praesagia ab iis etiam, qui in curationis methodo ab ipso recesserunt, optima judicata fuerint, quam hodie etiam a prudentissimis Medicis magno in pretio habeantur: quoad materiam medicam tamen nihil admiratione dignum habet. Est enim haec valde tenuis, & infratanti viri dignitatem posita, redoletque tabulas, ab ipso, ut ajunt, ex Deorum Medicinalium templis collectas; in quibus aegri, in fanis Aesculapii & Apollinis pernoctantes, aut in publica loca expositi, remedia, vel a Numine in somno percepta, vel a praetereuntibus emendicata, consignaverant, easque gratitudinis ac memoriae causa, in locis sacris suspenderant. Inveniuntur autem lib. 2, de morb. mul. adversus quasdam Fluoris albi species cathartica nonnulla vehementia, grana scil. cnidia, esula, veratrum, elaterium, &c. deinde styptica multa lacticina item & alia, quae vix, eo ordine saltem, quo ibi posita sunt, sine damni metu usurpari queunt, & neutiquam rebeli ejusmodi malo debellando sufficiunt. Superbit igitur hodierna Medicina pluribus pariter ac securioribus, magisque comitis & efficacibus auxiliis, quorum non exiguum numerum, licet Clarissimus Medicinae Candidatus

CAROLUS MAXIMILIANUS WELD/

in Dissertatione Inaugurali de curatione nobilis Matronae, Fluore albo laborantis, exposuerit, ut ulteriori eorum recensione

non

non opus esse videatur: unicum tamen adhuc adjiciam, aliunde allatum, & paucis hactenus adversus album fluorem familiare; sed *tertia* tamen vice, cum latissimo successu, ab Amico quodam, re ipsa magis, quam nomine ac functione Medico, usurpatum. Est istud, quantum ex relationibus clarissimorum virorum, nominatim D. Jo. Georg. Volckameri, in Eph. Germ. Dec. III. An. 7. & 8. obs. 210. deinde D. Speneri, in epistola ad celeberr. Valentinum, & D. J. G. Kisneri, Francofurt. Practici felicissimi, in literis ad me scriptis, nec non ex Actis Erudit. Lips. colligere licuit, herba, quæ *Hacmella, Acmella, Achmella, Atemella* & *Atmella* ab Insulæ Ceylan, unde in Europam transferatur, incolis appellatur. Ratione characteris pertinet ad plantas, Cæsalpino *corymbosas* dictas, chrysanthemis nonnullis affines, quorum flores, secundum Tournefortium, *flosculosi sunt, poppo carentes*, ubi flosculi *pentapetaloides stellati* seminibus insident parvis, oblongis, depressis, margine cinctis, ex fusco griseis, *duobus uncis* præditis, unde tota planta *Bidens*, & propter foliorum figuram, ab Hottone *Bidens urtica folio*, J. Breynio, autem in dissertatione Lugduni Bat. anno 1700. habitata, unde figura in Actor. Er. Lips. an. 1701. Januar. translata est, *Bidens Zeylanica, folio lamii* salutatur. Nascitur in locis umbrosis copiosissime; dum unica planta subinde decem millia seminum generare solet. Tota equidem in usum medicum trahitur; potissimum tamen folia ejus, media æstate, antequam flores erumpunt, colliguntur, & in umbra siccata asservantur. Mastiganti ab initio insipida videntur, paulo post autem linguæ caloris aliquem sensum imprimunt, sine acrimonia. Suntque singulare præsidium nephritide, ischuria & dysuria inveterata laborantibus, calculumque renum & vesicæ, blande resolutum, sine dolore expellunt. Adducit Hottton, apud Volckamerum, in testimonium non solum militem, qui plus, quam centum ægros ita restituerat, sed Societatis Indicæ Gubernatorem quoque & alios, nobilem plantæ hujus efficaciam

asserentes. Modus utendi est *in infuso*, cum ∇ calida, cui apud
Hollandos mel, vel glyzyrrhiza, vel sirub. de alth. Fern. admi-
scetur. Bibitur, ut thee, mane & vesperi, aliquot ante cibum
horis, non solum à Magnatibus, sed plebe etiam. A potu est
sudandum, & corpus a frigore custodiendum, vitandique cibi
falsi & acidi. Cum per diaphoresin non minus, quam diure-
sin agat, ideo in febribus etiam, colica, vertigine & mensium
obstructione egregie se gerit, ansamque dedit, ut in *fluore albo*
quoq; sub examen vocaretur; idq; cum successu. Quibus infusum
minus arridet, per spiritum vini & liquorem Arak Essentiam
inde & Extractum parant, & cum vino Rhenano vel Gallico
veteri, aut Potu Coffe, guttas, pro re nata, 12, 16, 20 & am-
plius propinant, effectusque inde egregios sentiunt. Provide
autem adhiberi debent ex Acnella parata remedia, (id quod
de aliis lithontripticis etiam valet) ubi calculus vesicam gran-
dior occupavit; ne intempestive versus urethram pellatur.
Plura in præsentia non addo: cum, quod reliquum est chartæ,
vitæ potius ac studiorum clarissimi Candidati nostri hi-
storix exponendæ, impendere debeam. Patria ejus est in
Franconia Cunreuthum, Castrum testamentarium perillustrum
Dominorum ab Egloffstein, cujus Præfectus, prudentia rerum
agendarum & optimis meritis maxime inclytus, Jacobus
Andreas Held/anno æræ Christianæ, supra millesimum sexcen-
tesimo octogesimo, altero mensis Junii die, felici partu, ex
charissima Conjuge, SUSANNA CORDULA KREBSIA,
Matrona probitatis ac vitæ, honestissime actæ, laude admo-
dum conspicua, suscepit. Prolixum foret, & a scopo ferme
alienum, longa oratione Majores nobilissimæ HELDIANÆ
ac KREBSIANÆ familiæ prosequi, eritque satis in præsentia,
WOLFFGANGUM FRIDERICUM & CHRISTOPHORUM
HELDIOS, CHRISTOPHORUMq; & ANDREAM CHRI-
STO-

STOPHORUM KREBSIOS , Jureconsultos celeberrimos,
meritisque in serenissimam Domum Brandenburgensem, illu-
strissimamque Remp. Norinbergensem spectatissimos viros,
avos nostri & proavum avunculumque, nominasse; quorum res
præclare gestæ ipsi exemplum virtutis , & incitamentum ad
honores, per studia & mores inculpatos aspirandi, præsentā-
runt. Quamprimum animus filioli fundamentis religionis ac
bonarum literarum excipiendis idoneus videbatur, nil prius
habebant optimi parentes, quam ut tenero pectori mature se-
mina pietatis & honeste vivendi rationes instillarentur; quod
ipsum per manuductionem Kuceri, cujus curæ privatæ erat
commissus, biennii spatio satis bene processit, ut postmodum
in Gymnasio Heilsbrunnensi à M. WENSELIO, Collega ter-
tio, ad humaniora studia duci, eademque in Scholæ trivialis
Svinfurtensis suprema Classe, sub directione M. EBERI, Con-
rectoris, eousque continuare posset, donec in Gymnasium re-
ceptus, ad Philosophicas acroases admitteretur. Audivit au-
tem D. SCHMIDIUM , Poliatrum & Professore Physices,
Philosophiam naturalem, M. & Profess. HEINISCHIIUM, Lo-
gicam & Metaphysicam, & M. Engelländern/ Prof. & Recto-
rem Gymnasii, Mathesin solide & perspicue explicantes. Cum
autem animum ad Medicinam adjecisset, nostram præ aliis ele-
git Academiam, in qua omnes atque singulas Apollineæ artis
disciplinas se commodissime apprehendere posse, non frustra
confidebat. Receptus anno M. DCIC, d. 3 Febr. a me, isto
tempore Rectore Academiae, in numerum Studioforum, præ-
missa repetitione Logicæ & Metaphysicæ in collegiis HE-
BENSTREITIANIS, Matheseos autem in HAMBERGERI-
ANIS , in quibus experimenta quoque physico-mathematica
curiosissima, cum novellarum utilissima explicatione tradita
accepit, sine mora auditoria medica, publica non minus, quam
privata adiit, ibiq; exlectionibus D. GEORGII WOLFFGAN-
GI WEDELII, Hæredit. in Schwarza/ Theoret. P. P. famige-
ra-

ratissimi, Com. Pal. Cæs. & Consil. Sax. spectatissimi, physiologicis, pathologicis & practicis maximum incrementum studiorum hausit. Nec silentio præteriri voluit solertissimas explanationes Aphorismorum Hippocraticorum, à D. ERNESTO HEINRICO WEDELIO, PP. Extra-Ord. Med. Duc-Prov. Vinariensi, & Poliatro Jenensi celeberrimo, publice institutas. Meo lateri adhæsit per integrum fere quadriennium constanter, sive publice botanicam, sive privatim anatomiam, chirurgiam aut chimiam exponerem. Interfuit enim tribus Collegiis anatomico-chirurgicis, quatuor dissectionibus cadaverum utriusque sexus, in theatro publico, multo pluribus autem judicialibus, duobusq; insuper exercitiis chimico-pharmaceuticis. Ad praxin privatissima mea usus est manu ductione; ut non solum morborum historias ab ipsis ægris, eorumq; internunciis audire, sed ad lectos decumbentium etiam accedere, medicamentorumq; misturam, applicationem atq; operationem observare ipsi liberum esset: cum & modesti, & seduli, gratissimiq; discipuli partes ubiq; tueretur. Cum nunc, venerandi Parentis jussu, Academia reliquenda sit, petiit ante menses aliquot receptionem in numerum Candidatorum, superavitq; jamdudum duo examina privata, physiologicum scil. & pathologicum, ut tertium tantum practicum, quod rigorosum vocant, restet, cui specimen publicum præmitti debet. Conscendet itaq; favente Deo, futuro die Jovis cathedram, & supra memoratam dissertationem, sub meo præsidio, defendendo, notitiæ in arte, cujus Doctor appellari cupit, acquisitæ, exemplum edet. Quem æctum ut Magnificus Dominus Pro Rector, & Patres Academici conscripti, cæterique omnium ordinum Hospites honoratissimi, una cum egregia charissimorum Commilitonum corona, honorifica sua præsentia splendidiorem reddere velint, est quod officiosissime & peramanter ab iis peto. P. P. Sub Sigillo Facultatis. Jenæ, d. XXIV Jun. MDCCIII.

(L. S.)